

21/08/2024

Aizawl

1830 Hrs

REGIONAL NEWS

HEADLINES:-

1. Ni 2 awh Mizoram Legislative fur thutkhawm chu vawiin khan Speaker Pu Lalbiakzama'n tiam chin awm lovin a ti tawp.
2. Vairengte leh Sairang bakah Bairabi leh Kolasib inkar kawng chhia siamthat thuai phutin Kolasib Dist lirthei neitu ten naktuk atanga tiamchin awmlova helai paltlang National Highway dan pin an tum chu chawhma dar 10 atangin an tan dawn tih an sawi.
3. Prime Minister Narendra Modia chu vawiin khan Poland leh Ukraine tlawh turin a zinchhuak.
4. Pakistan atanga sakhaw biak zin tuma Iraq pan lirthei chesualah mi 28 aia tlem lo an thi.

<><><>

ASSEMBLY ADJOURNED SINE DIE

Ni 2 awh Mizoram Legislative fur thutkhawm chu vawiin khan Speaker Pu Lalbiakzama'n tiam chin awm lovin a ti tawp a.

Mizoram Legislative Assembly pakua-na thutkhawm vawi 3-na tawpna vawiina neihah zawhna pahnih chhan hman niin Sawrkar bill leh paper bakah report hrang hrang pharh a ni.

Speaker Pu Lalbiakzama sawi danin tun session chungah hian chhan nghal chi zawhna (starred question) lut 273 atangin 263 pawm a nih thu leh ziaka chhan chi (unstarred question) 17 lut te pawm vek a ni a,

Report tur pawimawh 10 house dawhkanah pharh a ni a, sorkar lehkha pawimawh House dawhkana pharh 13 a awm a, official reslution pakhat pawm a ni a. Sorkar bill 5 te sawiho a nih hnuaw pawm vek an ni bawk.

Tuntum thutkhawm atana zawhna lut zingah Deptt. 4-in zawhna 7 an chhang lova, Deptt. pakhat chuan an chhan tura zawhna lut pathum te an chhang lo vek tih Speaker chuan sawiin, zawhna chhan kawngah Deptt. te tan la turin a chah a, Member te hriattur tul te a sawi zawh hnu ah Speaker Pu Lalbiakzama chuan Mizoram State Legislative Assembly 9-na thutkhawm vawithumna chu tiamchin awm lovin a titawp ta a ni.

<><><>

CM

Chief Minister Pu Lalduhoma'n sawrkarna an chelh atanga kumin June thla inkarah Mizoram Sawrkarin loan cheng vbch 909.85 a puk tawh a ti.

He thu hi nimina Assembly thutkhawma Lawngtlai West bialtu MLA Pu C. Ngunlianchungza zawhna ziaka a chhanna ah sawiin Chief Minister leh Finance changtu Pu Lalduhoma chuan sawrkar thar lakluh ni december ni 8, 2023 atanga kumin June thla inkarah Mizoram sawrkarin cheng vbch 909.85 a puk tawh a ti a, heng a pukna te hi Open Market Borrowing (OMB), National Bank for Agriculture and Rural Development (NABARD), Externally Aided Project (EAP) atangin leh Scheme for Special Assistance to States for Capital Investment (SASCI) te atangin a ni tih a sawi.

Chief Minister chuan state sawrkarin sum a puk thin chu state sawrkar sum indaihlohna hrang hrang leh revenue expenditure te leh leiba rulh mek nan hman thin ani tih a sawi bawk.

PMJVK

Finance changtu Chief Minister Pu Lalduhoman sorkar laipui scheme - Pradhan Mantri Jan Vikas Karyakram PMJVK kaltlanga tun sorkarin sum a la dawn loh chhan chu sorkar hmasa huna hna inpek thawh zawh loh tam lutuk vang a ni tih vawiin Assembly thutkhawmah a sawi.

House Leader Pu Lalduhoma chuan PMJVK chu minority te tana ruahman a ni a ti a, a tirah hmun thenkhat hman theiloh mahse tunah chuan state puma hman theih tura ruahman ani tawh tih sawiin a guidelines ang chuan zaa 80 chu zirna leh hriselna atana hman tur tih niin sawrkar hmasa ah za a za sports ah a kal a ti a, District Committee kaltlang loa hnathawh a tam hle tih sawiin diklo taka hna inpek tam tak a awm a ti.

Hetihlai hian sorkar hmasaa Sports Minister Pu Robert Romawia Royte MLA chuan sorkar hmasaa a dept chan Sports leh ICT in project an siamthiam avangin anni project chauh a tlang chu lawmpui tura a duh thu a sawi a, tuna PMJVK sum hi state sorkar in a hmuh sa a release loh vang niin a sawi bawk.

District Council & Minority Affairs Minister, Pu C Lalsawivunga chuan zawhna a chhanna ah Sorkar hmasa in PMJVK hnuoia project engemawzat a buatsaih sa te chu sorkar tharin umzuiin, sorkar laipui ah thehluh thlak vek a ni tawh tih a sawi a. Project Proposal 64 sorkar laipui ah an thehluh tawh a, tun Sorkarah PMJVK sanction thar hmuh a la nih loh thu leh PMJVK scheme atanga Vanapa Hall sakna tur cheng nuai 3700 a ruahman chu sorkar laipuiin a la ti fel lo tih a sawi a. PMJVK kaltlanga hmalakna te chu ram tan hmasawna ruhrel pawimawh dinna a nih avangin state sorkar chuan zaa 10 a tum ve tur chu pek chhoh zel a tum tih a sawi bawk.

<><><>

HOME MINISTER

Home Minister Pu K. Sapdanga'n kum 2022 atanga kumin inkarah Jail tang tlanchnhuak mi 56 an awm a ti a, heng zingah hian man leh mi 25 awmin mi 31 erawh man an la ni lo a ti.

He thu hi Assembly Session thutkhawma zawhna ziaka a chhanna ah sawiin Home Minister chuan tun dinhmunah Mizoram Jail hrang hrangah tang mi 1807 an awm mek a ti a, Aizawl Central Jail, bakah District Jail hrang hrang 7 te chu thawm that tura hmalak mek a ni a ti bawk.

Home Minister chhanna atanga lan danin Jail tang mi 56 tlanchnhuak zingah hian Jail atanga tlanchnhuak mi 33 an awm a, Court atanga tlanchnhuak 7 awmin Damdawiin atanga tlanchnhuak 8 an awm a, Police motor atanga tlanchnhuak 7 leh Prison Ambulance atanga tlanchnhuak 1 an awm bawk.

Sawrkar chhinchhiah danin kum 2022 ah tang tlanchnhuak 17 awmin Aizawl District atangin mi 11, Champhai atangin mi 3 leh Lunglei atangin mi 2 an awm a, Siaha District atangin tlanchnhuak pakhat a awm bawk.

Nikum kum 2023 ah tang tlanchnhuak 29 awmin Aizawl District Jail ah tlanchnhuak 7 an awm a, Lunglei ah mi 6 awmin Serchhip leh Champhai ah te 3 ve ve an tlanchnhuak a, Siaha ah 5 tlanchnhuakin Kolasib leh Lawngtlai ah tlanchnhuak pakhat ve ve an tlanchnhuak a, Women's Jail Aizawl atangin 3 an tlanchnhuak bawk a ni.

Kuminah tun thla August thlenga sawrkar chhinchhiah danin tang tlanchnhuak 10 an awm tawh a, tlanchnhuak te hi Aizawl District Jail atangin 7 awmin Serchhip District Jail atangin 2 an awm a, Kolasib Jail atangin pakhat a tlanchnhuak tawh bawk a ni.

Kum 2022 atanga kum 2024 inkara tlanchnhuak zingah hian Aizawl District atanga tlanchnhuak mi 8 te chu man an ni tawh a, Siaha atangin mi 6 man niin Lunglei atanga tlanchnhuak mi 3 man ni a, Champhai, Serchhip leh Women's Jail atanga tlanchnhuak mi 2 man tawh niin Lawngtlai leh Kolasib atanga tlanchnhuak mi 1 ve man an ni tawh a, an vaiin mi 25 man ni tawh a ni.

<><><>

HIGHWAY BLOCKADE

Vairengte leh Sairang bakah Bairabi leh Kolasib inkar kawng chhia siamthat thuai phutin Kolasib Dist lirthei neitu ten naktuk atanga tiamchin awmlova helai kawngpui dan pin an tum chu chawhma dar 10 atangin tan an tum a, Kolasib District Truck Owner's Association (KDTOA) leh Kolasib Joint Action Committee (JAC) Co-ordination Committee chuan vawiin khan thuchhuah intawm siam in, Kolasib District huamchhunga Kawngpui pawimawh a chhiat avanga, kawngpui tha an neih thuai theihna atan leh Zoram mipuite harsatna sutkian thuai anih beiseina avangin NH-54/306/06 kawngpui te lirthei eng chi mah tlanlo turin an ngen tih an sawi a, Kawngpui dan pin a nih avanga mipuiten harsatna an tawh loh nan sumdawngtuten an thil zawrh te a man bithliah pangngai aia to in tuman hralh lo turin an ngen bawk.

Road Block huaihawt tur hian khawchhunga lirthei vei vak te a huam dawn lo an ti a, Kawngpui dan pin hian, Dan leh thupek kengkawhtu Force leh Magistrate te, Medical duty te, zirlai naupang hruaitu lirthei te, PHE leh P&E deptt a thawktute, Special case (damloh leh chhiat tawk te leh a dang te) chu an awmna Branch YMA President/Secretary hriatpuina lehkha nei te, Press mite, Wifi & Network provider te leh Kawngpui chhe siamtute a huam dawn lo a ni, an ti.

Hetihlai hian kawngpui danpin tumtu lirthei neitu pawlte hian Kolasib District Magistrate Pu Robert C. Lalhmangaiha an kawm a ni.

<><><>

ASF

AH&Vety Department changtu Minister Pu C. Lalsawivunga'n kumin January atanga August ni 15 inkarah vawk pul hri African Swine Fever avangin vawk 9866 an thi tawh a ti a, vawk 17977 suat an ni tawh tih a sawi.

He thu hi Assembly a zawhna ziaka a chhanna ah sawiin Pu C. Lalsawivunga chuan kumin January atanga August ni 15 thlenga vawk thi leh suat avanga sum hloh zat chu cheng vbch 239 nuai 45 a ni a ti a, vawk hri ASF avanga hloh hi kum 2021 atanga 2022 inkarah cheng vbch 334.14 ani a ti a, kum 2022 atanga 2023 inkarah cheng vbch 210.32 ani tih a sawi.

Minister chuan kum 2021 leh 2022 inkarah vawk thi 33417 awmin vawk suat 12568 a awm a ti a, kum 2022 atanga kum 2023 inkarah vawk thi 12795 awmin vawk suat 11685 a awm tih a sawi bawk.

Minister chuan State pawn atangin vawksa lakluh thin ani tih sawiin Pune, Maharashtra atanga lakluh thin ani a ti a, State pawn atanga vawksa lakluh chu dan hmanga khap theih ani a ti bawk.

<><><>

MZP

Borapansuri a Chakma thenkhatin Mizo kut an thlak ni a sawi chungchangah Mizo Zirlai Pawl, MZP chuan Aizawla Chakma House leh Chakma MLA pahnih te inkawtah punkhawm an huaihawt.

MZP hruaitute chuan vawiin vek khan thutkhawm hmanhmawh kovin an President Pu H. Lalthianghlina chuan Legislator's Home kawtah Borapansuri a Chakma ten Mizo kut an thlak chungchang an demna leh MZP hmalakna te a sawi a. Sorkar hmalakna ngaihchan zui an rel a ni.

Vawiina pungkhawmte hian resolution pahnih, Boranpansury a buaina thlengah a tisuat tu te a rang thei ang berin chhui chhuah ni rawh se tih leh Ministerial inquiry din in a ti suat tu te hrem ni rawh se tih an ziaak a ni.

<><><>

PM

Prime Minister Narendra Modia chu vawiin khan Poland leh Ukraine tlawh turin a zinchhuak. A thlawhchhuah hmain PM Modia chuan thuchhuah siamin Poland chu Central Europe-ah eibar zawinna lama India thawhpui tha tak a ni a ti a. India leh Poland chuan mipui rorelna democracy leh midang pawmthiamna avangin an inlaichinna a tha em em a ni a ti. Pu Modia chuan Poland leh India inlaichinnain kum 70 a tling ta chu lawmawm a tih thu sawiin a Prime Minister leh a thian ni bawk Donald Tusk leh President Andrzej Duda te hmuh a beisei a ti bawk.

Ukraine a tlawh tur chungchangah PM Modia chuan Ukraine President Volodymyr Zelensky sawmnaa zin tum anih thu a sawi a. Tun tum hi India Prime Minister zingah Ukraine tlawh hmasa ber a ni ang.

<><><>

IRAN

Pakistan atanga sakhaw biak zin tuma Iraq pan lirthei chesualah mi 28 aia tlem lo an thi. Thudan danin he bus ah hian Shiite muslim mi Iran tlawh tumte chuangin Central Iran-ah an chesual a. Bus ah hian mi 51 an chuang a, Imam Hussein-a martar kum 40-na Arbaeen hman tuma zin an ni a. Shia Muslim maktaduai hnih chuangin tunah hian Ira1-a Najaf atanga Karbala inkar 80 km. chhungah kumtina an hman thin sakhaw hun pawimawh an hman mek a ni.

Tukin vek khan Sistan leh Baluchestan province ah bus chesualin mi 4 an thi a, mi 18 in hliam an tuar a ni. Iran ah hian traffic dan ngaihpawimawh loh vangte, lirthei tawng lutuk avangte leh a hun taka chhianatna hmuna damdawi lam an thlen thin loh avangin kumtin lirthei chesual an tam hle a. Kumtin chawhrualin lirthei chesualah mi 17000 vel thi thin anga chhut a ni.

<><><>

PM MANN KI BAAT

Prime Minister Narendra Modia chuan tun Pathianni chawhma dar 11 khian Akashvani kaltingin mipuite hnena thu a sawina Mann Ki Baat programme a hman leh dawn a. Mizo tawnga lehlinin a zui ang. Tun tum ami hi episode 113-na tur a ni.

Akashvani leh Doordarshan, AIR News website leh newsonair mobile app ah te ngaihthlak theih a ni ang a. AIR News, DD News, PMO leh Information and Broadcasting Ministry Youtube channel ah te livestream a ni ang.

<><><>